

ალ. ყიფშიძე

ბატონ-ყმობის გადავარდნა საქართველოში

1898
მოამბე
XII

ბატონ-ყმობის გადავარდნა საქართველოში*)

(საისტორიო ცნობა)

„გადაიწერე პირ-ჯვარი, მართლ-მადიდებელი გლეხ-კაცობავ, და ჩვენთან ერთად შესთხოვე ღმერთს, რათა მან აკურთხოს შენი თავისუფალი შრომა, – ეგ წინდი შენის კეთილ-დღეობისა და ქვეყნის წარმატებისა“.

მანიფესტი 19 თებერელისა 1864 წ.

ამ წლის 8 ნოემბერს შესრულდა სწორედ 34 წელიწადი ბატონ-ყმობის გადავარდნისა და გლეხთა განთავისუფლებისა ტფილისის გუბერნიაში. ერთის წლის უკან ბატონ-ყმობა გადავარდა ქუთაისის გუბერნიაშიც, ხოლო გაგიდა მას უკან ხუთი წელიწადიცა და შემოდებულ იქმნა ესრედ-წოდებული საგლეხო დებულება 1870 წლის 14 მაისისა ამიერ-კავკასიის სხვა გუბერნიებისათვისაც. ამ სახით, ერთის წლის განმავლობაში დამთავრდა ყოვლად მშვიდობიანად ბატონ-ყმობის გადავარდნის საქმე საქართველოში, ხოლო შემდეგს ხუთს წელიწადს მოეწყო მთელ ამიერ-კავკასიის გლეხთა საადგილმამულო საქმეცა.

შემოდგომის დამდეგს მობრძანდა ჩვენში და საქართველოს სამეუფო ქალაქმაც დიდის სიხარულით მიიღო ის, ვის დროსაც იქმნა შემოდებული ჩვენში შესანიშნავი ცვლილებანი – მისი იმპერატორებითი უმაღლესობა, დიდი მთავარი მიხეილ ნიკოლოზის ძე. გახარებული

სახე ტფილისის შკვიდრთა, რომელნიც მრავლად შეკრებილიყვნენ მთავარ-მართველის სასახლის წინა და ახალ სამხედრო ტაძრის ახლო-მახლო, ნამესტნიკად ნამეოფის მოლოდინში, უნებურად აგონებდა მხილველს იმ დიდის ხნის ამბავს, იმ სადღესასწაულო გარე-

*) ეს წერილი ნოემბრის ნომრისათვის იყო დამზადებული, მაგრამ სხვა-და-სხვა მიზეზების გამო მხოლოდ ამ ნომერში იბეჭდება.

მოებას, როცა იმავე სასახლის მახლობლად და გუნიბის მოედანზე, საცა ეხლა სამხედრო ტაძარია აშენებული, 34 წლის წინად, ბატონ ყმობის გადავარდნა მეფე-განმანთავისუფლებელის ნებითა საქვენოდ იქმნა გამოცხადებული. უნდა გიფიქროთ, რომ ტფილისი ხშირად არ შესწრებია თავის ხანგრძლივს ცხოვრებაში იმისთანა შესანიშნავს და ყოვლად სასიხარულო დღეებს. დიდის ამბითა და ცერემონიით იყო მაშინ გამოცხადებული უმაღლესი ბრძანება 1864 წლის 13 ოქტომბრისა გლეხთა განთავისუფლებისა და სხვა საგლეხო კანონ-დებულებათა შემოღების შესახებ. დიდებული წუთი იყო სწორედ! მთლად ტფილისის ბრწყინვალე მოხელეობა და უფლება-მოსილნი წარმომადგენელნი მთავრობისა, სამხედრო და საერო უწყებისანი, მონაწილენი იყვნენ ამ დღესასწაულისა. რა თქმა უნდა, რომ ამ ამბის დროს, უმთავრესი ადგილი ეჭირა ერთს, რომელსაც მისჩერებოდნენ თვალნი ყოველთანი და ეგ ერთი იყო მისი უმაღლესობა, დიდი მთავარი, ნამესტნიკი კავკასიისა.

მისის უმაღლესობის მობრძანებამ ტფილისს გვაფიქრებინა მოუთხრათ მკითხველთ მოკლედ ამბავი გლეხთა განთავისუფლებისა ჩვენში და საგლეხო კანონ-დებულებათა გამოცხადებისა, როგორც თვით ტფილისში, ისე გორსა, თელავსა და სიღნაღში, და აგრეთვე სოფლებშიაც. ხოლო ყოველივე ეს ამბავი, ხელმწიფე იმპერატორის ნებით, მოჰხდა 8 ნოემბერს, მიხეილ მთავარ-ანგელოზობის დღეს, ესე იგი სწორედ ნამესტნიკის სახელწოდების დღესა.

5 ნოემბერს 1864 წელს ხელმწიფე იმპერატორის უმაღლესის ბრძანებით მის უდიდებულესობის ფლიგელ-ადიუტანტმა, გვარდიის პოლკოვნიკმა ბარონ კორფმა მიართვა ნამესტნიკს სახელ-დებული უმაღლესი ბრძანება, მიწერილი უუმართებელესის სენატის მიმართ 13 ოქტომბერს 1864 წელს შესახებ ტფილისის გუბერნიის საბატონო გლეხთა განთავისუფლებისა, მათის ყოფა-ცხოვრების მოწყობისა და მათის ურთიერთობისა მებატონეთა თანა; მიართვა აგრეთვე იმ ბრძანებასთან ერთად დამტკიცებული 13 ოქტომბერსვე საგლეხო კანონ-დებულებანი.

იმ ცერემონიალის ძალით, რომელიც შედგენილ იქმნა ნამესტნიკის მთავარ-სამმართველოს საბჭოს მიერ, გამოცხადება ზემო-

ხსენებულის ბრძანებისა ერთსა და იმავე დღეს ტფილისშიაცა და სამაზრო ქალაქებშიაც ასე მოჰხდა: ჯერ გარდახდილ იქმნა სიონში სამადლობელი პარაკლისი ნამესტნიკის სახელ-წოდების მიზეზით, შემდეგ უმფროსი მთავარ-სამმართველოსი, სენატორი და სტატს-სეკრეტარი ბარონი ა. პ. ნიკოლაი, წევრნი ამიერ-კავკასიის ცენტრალის კომიტეტისა და, სამოქალაქო გუბერნატორის კ. ი. ორლოვსკის მაგიერ, რომელიც გორში იქმნა გაგზავნილი, ტფილისის ვიცე-გუბერნატორი ვლასტოვი, გაემართნენ გუნიბის მოედნისკენ და დაიჭირეს ადგილი იმ კიბის ზემო საფეხურზე, რომლითაც არსენალში ავიდოდა კაცი. არსენალის წინ, ბაქანზე, დადგნენ ტფილისის მყოფნი თავად-აზნაურნი; თვით მოედანზე დაცემული იყო კარავი, საცა უნდა შესრულებულიყო მღვთის-მსახურება, ხოლო მის აქეთ-იქით დაეჭირათ ადგილი ამ დღისთვის მოწვეულ მამასახლისებსა და ტფილისის მაზრის საბატონო სოფლებიდან მოსულ ორ-ორ დეპუტატს. როცა ყველა ზემოხსენებულნი შეიკრიბნენ და სამღვდლოებამაც თავი მოუყარა, მთავარ-სამმართველოს უფროსმა ბარონმა ნიკოლაიმ ხმა-მალა წაიკითხა უმაღლესი ბრძანება გლეხთა განთავისუფლების და ბატონ-ყმობის გადავარდნისა. ბრძანება ქართულადაც იყო გადათარგმნილი და რუსულთან ერთად წაკითხულ იქმნა მაშინვე ქართულადაც. შემდეგ სამღვდლოებამ გარდაიხადა პარაკლისი მრავალ-ჟამიერის წარმოთქმით ხელმწიფე იმპერატორისა და უავგუსტოესის სახლეთულობისათვის. გათავდა პარაკლისი და მამასახლისებს დაურიგდათ თითო ეკზემპლიარი უმაღლესად დამტკიცებულ დებულებათა. მას უკან მამასახლისნი და დეპუტატები გაემართნენ დიდის მთავრის სასახლისაკენ და იქ დამწკრივდნენ ორ-ორნი მაზრის უფროსის თავადის ბებუთაშვილის ხელ-მძღვანელობით; დამწკრივდნენ ისე, რომ პირი სასახლისკენა ჰქონდათ შექცეული.

მთავარ-სამმართველოს უფროსმა ცენტრალის კომიტეტის წევრებითურთ დაიჭირა ადგილი საგანგებოდ გამართულს მალლობზე; ეს მალლობი გამართული იყო ტროტუარზე სასახლის შუა-გულ აივნის პირდაპირ. მალლობის აქეთ-იქით ადგილი ეჭირათ თავად-აზნაურობის წარშობადგენელთ.

როცა მისი იმპერატორებითი უმაღლესობა გამოვიდა აივანზე, მთავარ-სამმართველოს უფროსმა წაიკითხა ყველასთვის გასაგონი ხმით სიტყვა ნამესტნიკისა, მიმართული ტფილისის გუბერნიის იმ გლეხ-კაცებისადმი, რომელნიც განთავისუფლებულ იქმნენ ბატონთა დამოკიდებულებისაგან; ეს სიტყვა კითხვის დროსვე ითარგმნებოდა ქართულადაც. შემდეგ წაგითხულ იქმნა სია იმათი, რომელნიც ნამესტნიკს დაენიშნა მომრიგებელ შუა-კაცებად და მათ კანდიდატე-

ბად ტფილისის მაზრისათვის. სიაში მოხსენებულნი იყვნენ: პირველ განყოფილებისათვის თ. ილია ჭავჭავაძე, მეორესათვის – თ. ივანე სუმბათაშვილი და მისი კანდიდატი ივ. გაბაშვილი და მესამესათვის – პოლკოვნიკი ისრაფილ იედიგაროვი და მისი კანდიდატი ლუარსაბ მელიქ-ბეგლაროვი.

მთავარ-სამმართველოს უფროსის განკარგულებით დამსწრე ხალხს დაურიგდა თითო ეგზემპლარი ნამესტნიკის სიტყვისა ქართულის თარგმანითურთ, იმ გლეხთა შესახებნი წესნი, რომელნიც მსახურებად ჰყვანდათ მებატონეებს (дворовые люди) და წესი იმისი, თუ რა რიგად უნდა ეხადნათ ყოველ-გვარი ხარჯი გლეხებს ორის წლის განმავლობაში, ვიდრე შესდგებოდა ესრედ-წოდებულნი მთავარ-სიგელნი (уставные грамоты). |

შემდეგ მამასახლისნი და დეპუტატები გაემართნენ ნიკოლოზის მოედანზე, საცა მის უმაღლესობას დაემზადებინებინა მათთვის სადილი.

მამინ გუბერნიის თავად-აზნაურობის წინამძღოლად იყო დიმიტრი ივანეს ძე ყიფიანი, რომელიც იქ მყოფ თავად-აზნაურებთან ერთად გაემართა სასახლეში. თავად-აზნაურობამ სასახლის დიდს დარბაზში მოიყარა თავი. მისი უმაღლესობა დიდი მთავარი მიხეილ ნიკოლოზის ძე გამობრძანდა დარბაზში თავად-აზნაურობასთან თვისის ამალითა, მთავარ-სამმართველოს უფროსითა, ცენტრალ კომიტეტის წევრებითურთ. მისის ბრძანებით ბარონ ნიკოლაიმ წაიკითხა უმაღლესი რესკრიპტი, მის სახელობაზე დაწერილი, იმის შესახებ, რომ ხელმწიფე იმპერატორმა ფული უბოძა თავად-აზნაურობას იმ პირადის მსახურის მაგიერ, რომელსაც უწევდნენ აწ უკვე განთავისუფლებულნი გლეხნი. ამის შესახებ გუბერნიისა და მაზრის

თავად-აზნაურთა წინამძღოლნი მთლად იქ მყოფ თავად-აზნაურობით სადილად მიიწვია დიდმა მთავარმა.

ამით გათავდა 8 ნოემბრის ამბები ტფილისში.

სამაზრო ქალაქებში უმაღლესის ბრძანების გამოსაცხადებლად გლეხთა განთავისუფლებისა და საგლეხო კანონ-დებულებათა შესახებ მის უმაღლესობის განკარგულებით გაგზავნილ იქმნენ განსაკუთრებული სანდო კაცნი, გორს – ტფილისის გუბერნატორი კ. ი. ორლოვსკი, თელავს – ი. ვიტტე *), ხოლო სიღნაღს – ნ. ბარანოვსკი. ამ ქალაქებშიაც ყოველივე საქმის შესახები ქალაქდები წაკითხულ იქმნა განგებ გაგზავნილ კაცების მიერ მოედანზე თანადასწრებით, როგორც საერო, ისე სამხედრო-სამაზრო მთავრობის და ხალხის წარმომადგენლებისა.

დღეს, 34 წლის შემდეგ, როცა ამოდენი ხანი გავიდა მას უკან, რაც ეს შესანიშნავი ამბები მოხდა, როცა ძველს თაობას, ბატონ-ყმობის ჰაერში აღზრდილს, მოჰყვა ახალი თაობა, ყმაწვი-

ლობიდანვე შეჩვეული ახალ წეს-წყობილებას; დღეს, როცა ყოველივე დადულდა, დაყმინდა და დაწყნარდა, მნელია მიჰხედეს ადამიანი, რა მღელვარებით და გულის ჩქროლვით ელოდნენ ტფილისში ამბავს იმათგან, ვინც მაზრებში იყვნენ გაგზავნილი ბატონ-ყმობის გადავარდნის გამოსაცხადებლად; მღელვარებით ელოდნენ, რა ამბავი მოვიდოდა იქიდან, ამიტომ რომ არ იცოდნენ, მშვიდობით ჩაივლიდა თუ არა ამისთანა დიდისა და ცხოვრების ძირეულად შემცვლელის კანონის გამოცხადება. რა სისწრაფითა და მოუთმენლობითა ჰგზავნიდნენ მაზრებიდან ტფილისში იქ გაგზავნილი კაცები შიკრიკებსა, ამას ცხადად დაგვანახვებს ერთი ამბავი: თელავიდან გამოგზავნილი შიკრიკი დავით ანდრონიკაშვილი ისეთის სისწრაფით თურმე წამოვიდა ტფილისს, ეგებ მალე ვახარო ამბავი, მშვიდობიანად ჩაიარა ბატონ-ყმობის გადავარდნის გამოცხადებამო, რომ ცხენმა ვერ შეუძლო და გზაში მოუკვდა. არ ვიცით, როგორ ჩამოახწია ამ იფრინდამ ტფილისს იმ დღესვე, ხოლო ეს კი ცნობილია, რომ, რაკი საკუთარი ცხენი გზაში მოუკვდა დაღლილობით, ტფილისის გუ-

*) ეხლანდელ ფინანსთა მინისტრის მამა.

ბერნატორის განსაკუთრებულის შუამდგომლობით, ანდრონიკაშვილს მისმა უმაღლესობამ ფელი უბოძა საჩუქრად.

პირველი დღე – 8 ნოემბერი, ყველგან მშვიდობიანად დაღამდა. თავად-აზნაურობამ ჯეროვანის დარბაისლობით, ამ ისტორიულის წუთის ყოვლადის შეგნებით და ფრიადის მოწიწებით მოისმინა ბრძანება გლეხთა განთავისუფლებისა, ხოლო თვით გლეხნი ცდითაც არსადა სცდილან კეთილ-გონიერების სამზღვარს გადასცილებოდნენ. ერთის სიტყვით, დიდებული დღე დაღამდა მშვიდობით, წესისა და მყუდროების დაურღვეველად, სასიხარულოდ მეფე-განმათავისუფლებელის საკაცთ-მოყვარეო რეფორმების ყოველ ჭეშმარიტის მომხრესი.

უმაღლესის ბრძანების გამოცხადება სამსავე ზემოთ ხსენებულ სამაზრო ქალაქში ისეთისავე დღესასწაულებრივის გამოჩინებითა და დიდებულობით მოჰხდა, როგორც ტფილისში. რადგანაც ცერემონიალი ბატონ-ყმობის გადავარდნის გამოცხადებისა ყველგან ერთნაირი იყო, ამიტომ ვიკმაროთ აღწერა იმ გარემოებათა, რომელიც შეუდგა უმაღლესის ბრძანების წაკითხვას გორში 8 ნოემბერს 1864 წლისას. გორის მაზრა თვისის მიწა-წყლის სიდიდით და თავად-აზნაურობის რიცხვ-მრავლობით უფრო საშიში უნდა ყოფილიყო იმ მხრივ, თუ რამდენად კეთილად ჩაივლიდა იქ ეს ამბავი და ამიტომაც იქმნა გაგზავნილი ამ მაზრაში ისეთი გამოცდილი და ჭკვიანი ადმინისტრატორი, როგორიც იყო მაშინდელი ტფილისის გუბერნატორი კ. ი. ორლოვსკი. კონსტანტინე ივანეს ძემ იმავე 8 ნოემბერს აუწყა მთავარ-სამმართველოს უფროსს, მისის უმაღლესობის კავკა-

სიის ნამესტნიკის საცნობელად, რომ «თუმცა დიდ-ძალმა ხალხმა მოიყარა თავი, თუმცა დიდად სხვა-და-სხვაობდა გრძნობანი, რომელიც აღელვებდა ამ ხალხს, რადგან სხვა-და-სხვაობდნენ დამსწრე წოდებანი, მაინც საოცარი წესიერება იყო დაცული; ის მყუდროება, მშვიდობიანობა და მოწიწება დიდად საყურადღებო ამბისადმი, რომელიც აქ იხილვებოდა, სწორედ ყოვლად სასახელო საქმედ უნდა ჩაითვალოს მთალდ ამ მხრის მკვიდრთათვის».

ბრძანება ხელმწიფე იმპერატორისა გლეხთა განთავისუფლების შესახებ შემდეგის წესითა და რიგით იქმნა გამოცხადებული გორში:

ბატონ-ყმობის გადავარდნა საქართველოში 41

1. გარდახდილ იქმნა საკრებულო ტამარში სამადლობელი პარაკლისი, რადგან მისის იმპერატორებითის უმაღლესობის, კავკასიის ნამესტნიკის სახელწოდების დღე იყო. საჩენ ადგილს იდგნენ: ორლოვსკი, მაზრის თავად-აზნაურთა წინამძღოლი თავ. ერისთავი და საერო და სამხედრო მთავრობის წარმომადგენელნი. შემოსილი სამღვდელოება ლიტანიით გაემართა მოედანზე და დასდგა იქ, საცა წინადვე ნაწვენები ჰქონდა ადგილი.

2. ორლოვსკი ავიდა განგებ გამართულ ბაქანზე იმათთან ერთად, ვინც ცერემონიალით იყო დანიშნული. ავიდნენ ისინიცა, ვინც ტფილისიდანვე მოჰყვენენ ორლოვსკის, სოვეტნიკი საგუბერნიო მმართველობისა აქიმოვი *), განსაკუთრებულ მინდობილობათა მოხელენი: მელიქ-ბეგლიაროვი და იაგნიცკი. ორლოვსკიმ გამოუცხადა თავად-აზნაურობას, გლეხ-კაცობას და მთელს ერს ბრძანება ხელმწიფე იმპერატორისა, რომელიც მაშინვე ქართულადაც იქმნა წაკითხული ბლალოჩინის სოლომონ ხახანაშვილის მიერ. გუბერნატორმა მიულოცა ხალხს ეს ამბავი და ხალხმაც იგრიალა და სიხარულით იძახდა «ურასა».

3. შემდეგ გარდახდილ იქმნა პარაკლისი მუხლ-მოდრეკით ხელმწიფე იმპერატორის სიმრთელითა და დღეგრძელობით ცხოვრებისათვის. პარაკლისს დაესწრო სხვათა სამღვდელოებაც, სახელდობრ სამღვდელოება სომეხთა და კათოლიკეთა.

4. ორლოვსკი კვლავ ავიდა ბაქანზე ზემოხსენებულ მოხელეებითურთ და წაკითხა მიმართვა მისის იმპერატორებითის უმაღლესობისა, კავკასიის ნამესტნიკისა. ეს მიმართვაც დამსწრეთ დიდის სიხარულით მიიღეს და ერთხმად დასძახეს «ურა». ბლალოჩინმა ხახანაშვილმა მიმართვაც მაშინვე წაუკითხა ხალხს ქართულად. ამ დროსვე იქმნა წაკითხული სახელი და გვარი მომრიგებელ შუაკაცთა და მათის კანდიდატებისა. მომრიგებელნი შუაკაცნი, ორლოვსკის თხოვნით, ავიდნენ მაღლა ბაქანზე და დაენახვნენ ხალხს *).

*) ეხლანდელი წევრი – საქმეთ-მწარმოებელი ტფილისის საგუბერნიო სა-

გლახო საქმეთა საკრებულოსი.

*) გორის მაზრის მომრიგებელ შუა-კაცებად იქმნენ დანიშნულნი: 1 განყოფილებისათვის – კორნეტი თ. რევაზ შალვას ძე ერისთავი, მის კანდიდატად – თ. სოლომონ ზურაბის ძე ერისთავი; 2 განყოფილებისათვის – შტაბს-კაპიტანი

42

მოამბე

5. როცა სამღვდელოება დაბრუნდა უკან საკრებულო ტაძარში, გლახ-კაცობას დაურიგეს თითო ცალი საგლახო კანონდებულებისა. არ დაურიგეს მხოლოდ დებულება მომრიგებელ შუა-კაცთა დაწესებულებისა, მსახურთა და ხიზანთა შესახები, რადგან ეს დებულება არ იყო ქართულად თარგმნილი და შიშობდნენ, ვაი თუ სხვაფრივ გაიგონ რუსულად დაბეჭდილი დებულებანი და ბოროტ-განმზრახველობით სხვაფრივ ახსნას ვინმე ზოგიერთი მისი მუხლიო. თავად-აზნაურთ კი წინამძღოლმა დაურიგა რუსული დებულებანი.

6. თავად-აზნაურობამ თავი მოიყარა მაზრის უფროსის თავ. ერისთავის სახლში და იქ გამოეცხადათ უმაღლესი რესკრიპტი, რომ თქვენ გებოძათ ამდენი და ამდენი ფული ყმათა ჩამორთმევის მაგიერ და იმ პირადის სამსახურის ნაცვლად, რომელსაც გიწევდათ გლახ-კაცობაო. ეს რესკრიპტი აღტაცებით მოისმინა თავად-აზნაურობამ და ერთგულის ქვეშევრდომობის გრძნობანიც გამოსთქვა ხელმწიფე იმპერატორის მიმართ.

7. შემდეგ, კ. ი. ორლოვსკიმ მისის უმაღლესობის, კავკასიის ნამესტნიკის სახელით, მიიწვია ხალხი სადილად. სადილი მომზადებული იყო ზემოხსენებულს მოედანზე, საცა ერთს მხარეს თავად-აზნაურობისათვის იყო გაშლილი სუფრა, ხოლო მეთრეს – გლახ-კაცობისათვის.

სადილად იყვნენ მოწვეულნი თავად-აზნაურთა (300 კაცი), მართლ-მადიდებელ, სომეხთა და კათოლიკეთა სამღვდელოების გარდა, სამხედრო-საერო მთავრობის წარმომადგენელნიც, გორის ქალაქის დეკუტატები და სამატოო მოქალაქენი. გლახებთან ერთად გაუმასპინძლდნენ დიდის მთავრის სახელით ჯარის-კაცებსა და ყაზახებსაც, რომელნიც პარადში იღებდნენ მონაწილეობას, აგრეთვე ამქრებს უსტაბაშებითურთ და საერობო დარაჯობის მოხელეთა.

კონსტანტინე ზაქარიას ძე თარხნიშვილი, მის კანდიდატად თ. მიხეილ დავითის ძე ციციშვილი; 3 განყოფილებისათვის – გედევან ქრისტეფორეს ძე ანანიაშვილი, მის კანდიდატად თ. დ. ლ. აბაშიძე; 4 განყოფილებისათვის – თ. გიორგი ივანეს ძე ციციშვილი, კანდიდატად თ. დავით ლუარსაბის ძე ერისთავი და 5 განყოფილებისათვის – პოდპორუჩიკი ალექსი კვალიაშვილი, კანდიდატად – როტმისტრი ალ. ნათიშვილი.

ბატონ-ყმობის გადავარდნა საქართველოში

43

3. სადილზე გუბერნატორმა სამი სადღეგრძელო წარმოსთქვა:

ერთი ხელმწიფე იმპერატორისა, მეორე – დიდის მთავრის მიხეილ ნიკოლოზის ძისა და მესამე – ორსავე წოდების – თავად-აზნაურობისა და გლეხ-კაცობის – კეთილ-დღეობისა და წარმატებისათვის. თითო-ეულ სადღეგრძელოს შემდეგ გლეხ-კაცი მოდიოდნენ ორლოვსკის-თან და გულ-წრფელს მადლობას სწირვდნენ. ერთმა მათგანმა და-ახლოვებით შემდეგი მოახსენა გუბერნატორს:

«ქალაქს რომ დაბრუნდებით, მოასსენეთ დიდს მთავარს ჩვენი გულითადი მადლობა იმ მოწყალებისთვის, რომელიც ნამესტნიკმა გამოსთხოვა ჩვენთვის ხელმწიფესა; მადლობა მოახსენეთ, რომ ასე მოწყალებით გვექცევა და მუდმივ ჩვენთვისა ზრუნავს. სულ იმას შევსთხოვთ ღმერთსა, რომ ბედნიერად და დღეგრძელობით ამყოფოს მისი უმაღლესობა».

ეს სიტყვები ცხადად ამტკიცებს, ვის აწერდა მდაბიო ხალხი გლეხთა განთავისუფლების საქმეს ჩვენში.

9. სადილს შემდეგ გუბერნატორი გლეხ-კაცობასთან მივიდა; მივიდა მათთანვე თავად-აზნაურობის წინამძღოლიცა, რომელსაც გარს ერტყნენ თავად-აზნაურნი, და მიჰმართა გლეხ-კაცობას გამო-თხოვების სიტყვით. ორლოვსკი ჰმოწმობდა მთავრობის წინაშე, რომ წინამძღოლის სიტყვა დიდად მოეწონათ საყოველთაოდაო. აი რა სთქვა წინამძღოლმა თავადმა ერისთავმა:

«გლეხ-კაცნო! მოგილოცავთ, ვითა წინამძღოლი, ჩვენის ხელ-მწიფის წყალობასა – თავისუფლების მონიჭებასა. ჩვენის მხრით, ჩვენც, თავადაზნაურნი, ჩვენის ხელმწიფის სურვილისამებრ, თანა-ხმანი გავხდით თქვენის განთავისუფლებისა. მამ, ჩავიბეჭდოთ გულში დღევანდელი მაღალ-მნიშვნელოვანი დღე, როგორც ჩვენის, ისე თქვენის ცხოვრებისა და გავიხსენოთ ჩვენი ურთიერთობა, ჩვენი ძველებური, სათნოებით სავსე ერთმანეთობა. როცა საერთო უბედურება რამ დაგვატყდებოდა, ან მტერი დაგვესხმოდა თავს, ორივე წოდება, თქვენცა და ჩვენც, შევერთდებოდით ხოლმე და ერთსუ-ლობით ვებრძოდით ჩვენის მშობელის ქვეყნისა და სარწმუნოების მტერს. ასე იყო დღემდე: ჩვენ თავადაზნაურნი მამობას გიწვევდით, ხოლო თქვენ შვილები იყავით ჩვენი. ახლა, როცა გამოცხადდა

საგლეხო კანონ-დებულებანი, როცა ბატონ-ყმობა გადავარდა, ჩვენი ურთიერთობა უნდა შეიცვალოს – ისე უნდა ვსცხოვრობდეთ ახლა, როგორც ღვიძლი ძმები. დარწმუნებულნი უნდა იყვნეთ, არც ახლა მიგატოვებთ და არ მოგაკლებთ მზრუნველობას. თქვენის მხრით, ნურც თქვენ ამოირეცხავთ გულს ჩვენზე, ნუ უარ ჰყოფთ თქვენთა მამა-პაპათაგან ნაანდერძევს, დაბადებითვე თან-დაყოლილს ერთგუ-ლებას თავად-აზნაურობისადმი და ვიყვნეთ ყველანი ერთად, თავად-აზნაურნიცა და გლეხნიც, ერთგულნი ქვეშევრდომნი ჩვენის ყოვლად უმოწყალესის ხელმწიფისა. შეურყეველი ერთგულება კანო-

ნიერის მეფეებისა განსაკუთრებული ხასიათის ქართველის ერისა წოდების განურჩევლად. შევირჩინოთ, მაშ, ეგ ხასიათი მომავალშია, ძვირფასნო ძმანო ჩემნო! ვსვამ მთელის ქართლის თავად-აზნაურობის სახელით თქვენს სადღეგრძელოს და ვისურვებ თქვენთვის ყოველსავე კეთილდღეობას და წარმატებას ახალს ცხოვრებაში. კეთილად მოსაგონებელი იყოს თქვენი მამაშვილური ერთგულება ჩვენდა მომართ და ჩვენი მამობრივი მზრუნველობა თქვენის ბედნიერებისათვის»!

კ. ორლოვსკის მოწმობით, «ამ სიტყვის წარმოთქმით დასრულდა 8 ნოემბრის დღე, სამარადისოდ დასახსომებელი საქართველოსთვის». საღამოზე გორი გაჩირადდნებულ იქმნა, ხოლო მოედანი, რომელზედაც შესრულდა იმ დღის სადღესასწაულო ცერემონია, მორთული იყო ვენზელებრ დახატულის ერისათვის ძვირფასის ხელმწიფე იმპერატორისა და დიდის მთავრის კავკასიის ნამესტნიკის სახელებით.

—

15 ნოემბრისთვის იყო დანიშნული წაკითხვა 13 ოქტომბრის 1864 წლის თარიღით აღნიშნულის უმაღლესის ბრძანებისა გლეხთა განთავისუფლების შესახებ ტფილისის გუბერნიის ყველა სოფლის ეკკლესიაში. ამ აზრით, საქართველოს ეგზარხოსმა ჯეროვანი განკარგულება მოახდინა და შესაფერი დარიგება დაუგზავნა ბლალოჩინებს. ხოლო საერო მთავრობამ გაუგზავნა ბლალოჩინებსვე საჭირო რიცხვი საგლეხო კანონ-დებულებათა წიგნებისა ქართულის თარგმანითურთ და დაავალა მაზრისა და ოლქის უფროსებსა, ჯეროვანი შემწეობა

ბატონ-ყმობის გადავარდნა საქართველოში 45

და დახმარება აღმოეჩინათ ამ წიგნების დაგზავნის საქმეში, რათა ყოველს მრევლს მისვლოდა ის წიგნები. სამრევლოების რიცხვი მაშინ მთელს გუბერნიაში 381 იყო. თუმცა სოფლის ხალხს უკვე გაგებულნი ჰქონდა თავიანთ მამასახლისებისა და დეპუტატებისაგან, რაც სადღესასწაულო. ამბები მომხდარიყო. 8 ნოემბერს ტფილისსა, გორსა, თელავსა და სიღნაღში, ისე რომ 15 ნოემბერს ის ახალს აღარას გაიგონებდა, მაგრამ მაინც ბრძანების წაკითხვამ ბატონ-ყმობის გადავარდნის შესახებ ეკკლესიაში შემოსილ მღვდლების მიერ, როგორც მოსწრებულნი კაცნი ამბობენ, დიდად იმოქმედა ორსავე წოდებაზე და მრავალ-გვარი გრძნობა დაჰბადა მათს გულში: ზოგი ააგულჩვილა და აღტაცებაში მოიყვანა, ზოგი დაალონა და გააშტერა.

დღესაც მთელს ქართლშია გავრცელებული ერთი ზღაპრის მზგავსი ამბავი, რომ ვითომ ერთმა აზნაურიშვილის ქვრივმა, მოხუცებულმა მანდილოსანმა, როცა შვილი დაღონებული მიუვიდა გორიდან ბატონ-ყმობის გადავარდნის მეორ-მესამე დღეს, პკითხა:

რას დაღონებულხარ, ხომ არა წაგეკიდა-რა ავიო? შვილმა თურმე უპასუხა, რომ მოხელეებმა, მეფის ბრძანებით, გამოუცხადეს გლეხ-კაცობას, თავისუფალნი ხართო და ამას იქით შენ, დღემდე კეთილ-შობილი აზნაურიშვილის ქვრივი, ქალბატონი აღარა ხარო. «როგორ თუ, – შეჰყვირა თურმე მოხუცმა და, რასაკვირველია, არ დაუჯერა შვილს, ვერ წარმოიდგინა, რომ მაგისთანა რამ ამბავი შესაძლებელი ყოფილიყოს, – როგორ თუ თავისუფლება?! განა ეგ საფიქრებელია? მერე მამა-მზე სად იყო, როცა მოხელეები მაგისთანა როშვას მოჰყვენენ? (მამა-მზე იყო ერთი გავლენიანი თავადიშვილი – ერის-თავთაგანი)».

განსაკუთრებულის ძლიერებით იმოქმედა ხალხზე ნამესტნიკის მიმართვამ. დროულ კაცთა მოწმობით, მიმართვის უკანასკნელმა სიტყვებმა ბევრს აღვრევინა ცრემლი სიხარულისა და მადლობისა იმათ მიმართ, ვინც იყვნენ მიზეზნი გლეხ-კაცთა განთავისუფლებისა. მართლაც, უკანასკნელი სიტყვები მიმართვისა, გამსჭვალული სიყვარულით გასანთავისუფლებელ გლეხ-კაცობისადმი და თან მის ნდობითაც, ისეთი სიტყვებია, რომ არ შეიძლებოდა ღრმად არ შეერყია

46

მოამბე

გული გლეხ-კაცთა. გლეხ-კაცობამ დიდხანს ითმინა საშინელება და ყოვლადი უმსგავსობა თვისის უფლება-აყრილ მდგომარეობისა და ბატონ-ყმურის წეს-წყობილებისა, რომელიც საზოგადოდ სამძიმო და საზიზღარი იყო, მიუხედავად იმისა, რომ ათასში ერთგან და ათასში ერთხელ ბატონ-ყმური ურთიერთობა შესამჩნევად სათნო ხასიათს იჩენდა და მამა-შვილურს, მამობრივის მზრუნველობით გამსჭვალულ დამოკიდებულებას მიაგვანდა. მაგრამ აი თვით სიტყვები მიმართვისაც:

«მკვიდრნო სოფლისანო, ბატონ-ყმობისაგან განთავისუფლებულნო!

«იმედი მაქვს დააფასებთ და მიხვდებით, რა დიდის ყურადღების ღირსია და რა დიდი მნიშვნელობა აქვს დღევანდელს დღეს, რომელიც ახალს გზას გიხსნით; დააფასებთ იმ უფლებათა ძალას, რომელიც დღეის ამას იქით თქვენ გენიჭებათ და რომელიც გაგხდით თქვენის ქონების სრულ და ხელ-შეუვალ პატრონად, თქვენის ოფლისა და ამაგის სრულ ბატონად. იმედი მაქვს, მიხვდებით, ვის მადლობელნიც უნდა იყვნეთ ამ წყალობისათვის. ხელმწიფე იმპერატორი მოწადინებულა მოაწოს და მოაგვაროს კეთილი ცხოვრება ყველა თავის ქვეშევრდომისათვის და, რასაკვირველია, არც თქვენ გამოგწირავდათ, არც თქვენ მოგაკლებდათ თავის უმაღლეს ზრუნვასა.

«თქვენთვის ახლა გზა ხსნილია და ამ გზაზე სიარულით თამამად შეგიძლიანთ კეთილი ცხოვრება დაიმკვიდროთ; პატიოსანის, გულ-დამყარებულის შრომით თქვენ შეგიძლიანთ კიდევ უფრო განავითაროთ იგი კეთილი ცხოვრება, დაზოგვითა და მწიკვლ-მოუცხო-

ბელის ცხოვრებით განადლიერებთ თქვენთა და თქვენთა შვილთა ქონებას. ეს არის სურვილი ხელმწიფე იმპერატორისა. ამის იმედი მაქვს მეც თქვენგან.

«კურთხევა უფლისა იყოსმცა თქვენ თან იმ ახალს გზაზე, რომელიც იხსნება თქვენ წინა».

ასეთის ენით მანამდე არავინ ელაპარაკებოდა გლეხ-კაცობას და ამიტომ გასაკვირველი არ არის, რომ ნამესტნიკის მიმართვის სიტყვები ღრმად ჩასწვდათ გულში გლეხ-კაცებს. ხოლო დაპირება მისი უმაღლესობისა, რომ მე თვითონ ვადევნებ თვალ-ყურს ჩემ

ბატონ-ყმობის გადავარდნა საქართველოში 47

მიერ დანიშნულ მომრიგებელ შუა-კაცთა და საგლეხო საკრებულოს მოღვაწეობასაო, სრული თავ-მდეები უნდა ყოფილიყო მისი, რომ გლეხთათვის «ახლად გახსნილი გზა გეთილ-დღეობის შეძენისა» ჯაგნარად არ გადაიქცეოდა *).

ამ სახით, 8 დს 15 ნოემბერი 1864 წლისა იყო დღეები ბატონ-ყმობის საბოლოოდ გადავარდნისა საქართველოში და ამიტომ ამ ორს დღეს არა მცირედი საისტორიო მნიშვნელობა აქვს. გარნა, როგორც ყოველთვის, ამ შემთხვევაშიც საქმე ისე ვერ დაბოლოვდა, რომ სასაცილო რამ ამბავი არა მომხდარიყო-რა. მთავრობას დაავიწყდა დაებარებინა 13 ოქტომბრის 1864 წლის ბრძანების გამოცხადების მოსასმენად მამასახლისნი და დეპუტატები ფშავ-ხევსურეთის 15 სოფლიდან და მთის ოლქის 5 სოფლიდან. ერთის სიტყვით, მთავრობა ჰგონებდა, რომ 15 ნოემბერს, საღამოზე არც ერთი ყმა აღარსად მოიპოვება მთლად ტფილისის გუბერნიაშიო; ის კი არა თუ მთელის 20 სოფლის გლეხ-კაცობამ, რომელიც სცხოვრობდა საქართველოს ყრუ და მივარდნილს კუთხეებში, სრულიად არა იცოდა-რა თავისის ბედისა. მალე კი მიხვდა მთავრობის მოხელეობა თავის შეცდომას და 16 ნოემბერს გაეგზავნა ქალაქი თიანეთისა და მთის ოლქის უფროსს, მოუყარეთ თავი ზემოხსენებულ 20 სოფლის წარმომადგენელთ ერთს რომელსამე ადგილას და გამოუცხადეთ ბრძანება ბატონ-ყმობის გაუქმების შესახებ იმავე წესით, რა წესითაც სხვა სოფლებში გამოცხადდა ეგ ბრძანებაო.

გავიდა ერთი გვირა ასეთს გამწვავებულს მოღვაწეობაში, კვირა ფრიად შესანიშნავი და საგულისხმიერო (8 --15 ნოემბრამდე) და მთავარ-სამმართველოს უფროსმა მიიხმო ტფილისის ყველა მომრი-

*) მოხუცებულნი გვიამბობენ, რომ უმაღლესის ბრძანების კითხვის დროს სოფლის ეკლესიებში დალაბანდის კვრა იყოვო. ოფიციალურს ქალაქებში არავითარი ამისთანა განკარგულება არ მოიპოვება, და არც ყველგან იქნებოდნენ მედალაბანდენი. ხოლო რომ კითხვა ბრძანებისა ზოგიერთს სოფლებში უდალაბანდოდ არ მომხდარა, არც ეგ არის საეჭვო. არც ის არის ცნობილი, ვისი აზრი უნდა ყოფილიყ. ეს უცნაური აზრი დალაბანდის კვრისა? უეჭველი მხოლოდ ის არის, რომ ახალს ხანას ორის წოდების ცხოვრებისას ეგ დაფის კვრაც მართლა თან

დაჰყვა ზოგიერთს ეკლესიაში და ისე გაისმა, თითქო ანდერძს უგებენ ძველს საზოგადოებურს წეს-წყობილებას; იმ წეს-წყობილებასაო, რომელსაც უკვე მოეჭამა თავისი წუთი-სოფელი და საფლავში აპირობდა ჩასვლას.

გებელნი შუა-კაცი და მათი კანდიდატები, რომელნიც უნდა წარდგენოდნენ მის უმაღლესობას, კავკასიის ნამესტნიკს. მომრიგებელმა შუა-კაცებმა ინახულეს მისი უმაღლესობა და პირად მისგან მოისმინეს შესაბამი დარიგება და მიიღეს ინსტრუქცია იმის შესახებ, თუ როგორ უნდა ემთქმედნათ უკვე გამოცხადებულის ცვლილების განსახორციელებლად *). «პირველ მოწოდების» ანუ პირველად დანიშნულ მომრიგებელ შუა-კაცთა ხერხიანობას, მათს საქმისადმი გულ-წრფელს სიყვარულსა და ერთგულებას უნდა ვუმაძღლოდეთ, უნდა გუმაძღლოდეთ აგრედვე იმ მაღალს მზრუნველობასა და ყურადღებას, რა მზრუნველობითა და ყურადღებითაც ადევნებდნენ თვალ-ყურს საგლეხო რეფორმის მსვლელობას მისი უმაღლესობა და მისნი ღირსეულნი თანამოღვაწენი: ბარონი ა. პ. ნიკოლაი და კ. ი. ორლოვსკი, რომ ორის წლის განმავლობაში ყველგან შედგენილ იქმნა ძირითადნი სიგელნი (уставные грамоты); და შედგენილ იქმნა ისე, რომ არსად მყუდროება და წესიერება იოტის ოდნადაც არ დარღვეულა. მხოლოდ ერთი შემთხვევა მოხდა და ისიც გამოძიების შემდეგ ცრუპენტელობა აღმოჩნდა მხოლოდ. და აი ამ შემთხვევამ შეაწუხა რამდენისამე წუთით გული ჩვენის ქვეყნის მაღალის გამგებლისა. ეგ შემთხვევა იმდენად სახალისოა და თან სასაცილო, რომ არ შეგვიძლიან არ ვუამბოთ მკითხველს.

ნამესტნიკის ყურამდე მიადწია ამბავმა, რომ სოფელს ახალქალაქში უწესოება მოჰხდაო და რომ ვითომ იარადიც იქმნა ხმარე-

*) მოვიყვანთ აქვე სახელსა და გვარს დანარჩენ მაზრების მომრიგებელ შუა-კაცთა, და აგრედვე საგლეხო საქმეთა საკრებულოს წევრთაცა. თელავის მაზრაში: მომრიგებელი შუა კაცი 1-ლ განყოფილებისა მისის უმაღლესობის ამაღლის გენერალ-მაიორი თ. დავით ალექსანდრეს ძე ჭავჭავაძე, კანდიდატი პაატა მგალობლიშვილი; მე-2 განყოფილებისა – თ. ი. რ. ჯორჯაძე, კანდიდატი თ. მიხეილ ყარალაშვილი; სიღნაღის მაზრაში: 1-ლ განყოფილებისა თ. სვიმონ თომას ძე ანდრონიკაშვილი. (დღესაც მომრიგებელ შუა-კაცად იმყოფება), კანდიდატი თ. დავით ვაჩნაძე; მე-9 განყოფილებისა თ. რევაზ ვაჩნაძე. 8 ნოემბერს შემდგარ საგლეხო საქმეთა საკრებულოში იყვნენ: თავსმჯდომარე (თვით გუბერნატორი), წინამძღოლი გუბერნიის თავად-აზნაურობისა დ. ი. ყიფიანი, ოთხი წევრი, არჩეული თავად-აზნაურობის მიერ: გენერალ-მაიორი თ. ვახტანგ ორბელიანი, სტატსკი სოვეტნიკი თ. რამაზ ანდრონიკაშვილი, თ. ვახტანგ გურამიშვილი და თ. ერასტი ჩოლაყაშვილი; ოთხი წევრი საქმეთ-მწარმოებელი: თ. იასე ნოშრევანის ძე ჭავჭავაძე, იოსებ ქრისტ. ძე მამაცაშვილი, კ. დ. დოლინსკი და კორნ. ალ. ბოროზდინი და ორი უფროსი მოხელე კავკასიის ნამესტნიკის მთავარ-სამმართველოსი, სულ 12 კაცი.

ბულიო. ეს ამბავი გუბერნიის თავად-აზნაურობის წინამძღოლმა დეპუტატმა აცნობა გორის მაზრის უფროსს და თან სთხოვა, პირადად თქვენ გამოიძიეთ ეგ საქმეო. თქვენი ერისთავი მივიდა ახალ-ქალაქს და არავითარი კვალი უწესოებისა იქ არა სჩანდა-რა. სოფელი არავითარ ბაიბურში არ იყო და ჩვეულებრივი, სადაგი ელფერი ედომის მიყუჩებულს ცხოვრებას. უწესოების ამბავი აი საიდან თურმე გაჩნდა; 27 ნოემბერს მოვიდა გორიდან ახალქალაქის საფოსტო სადგურზე სამხედრო-სამუშაო რაზმის კომანდირი შტაბს-კაპიტანი კრიჟანოვსკი და სადგურის უფროსს ცხენები მოსთხოვა. ცხენები აქეთ-იქით იყო გაგზავნილი და კრიჟანოვსკი ცარიელი დარჩა. მართალია, უფროსს კიდევ ჰყავდა 5 თავისუფალი ცხენი, მაგრამ ეგ ცხენები უფროსმა შტაბს-კაპიტანს არ დაანება და უჩვენა კიდევ მოწერილობა გუბერნატორისა, 5 ცხენი მუდამ მზადა გყავდეს, ამ დღეებში გამოივლის გენერალ-ადიუტანტი ბარონ ნიკოლაიო (ძმა მთავარ-სამმართველოს უფროსისა). კრიჟანოვსკიმ მოინდომა გაეგო მიზეზი ბარონის მისვლისა ახალ-ქალაქში, მაგრამ სადგურის უფროსმა ეგ მიზეზი არ იცოდა და რას ეტეოდა. მაშინ კრიჟანოვსკიმ შეჰყვირა თურმე: «თქვენ სულ გძინავთ და არა იცით-რა! ბარონი იმიტომ მოდის აქ, რომ მებატონეთა და გლეხთა შორის უწესოება მომხდარა ახალ-ქალაქში და უწესოების დროს იარაღიც უხმარნიათ». უფროსმა კალუგინმა ეს სიტყვები კრიჟანოვსკისა გადასცა ერევნის პოლკის აფიცრების შტაბს-კაპიტანს ფედორენკოსა და პრაპორჩიკს ბირშერტსა, ხოლო ფედორენკომ უამბო ყოველივე ესე ახალ-ქალაქში მოსულს 27 ნოემბერს მისის უმაღლესობის კარის შტალ-მეისტერს დ. სტ. სოვ. გროტს, რომელმაც მიწერა ნამესტნიკს, რომ ვითომ ახალ-ქალაქში უწესობა მოხდაო.

ეს გარემოება იყო ერთად-ერთი უსიამოვნო ამბავი 1864 წლის მიწურულებში მომხდარ შესანიშნავ სადღესასწაულო ამბავთა შორის.

დასასრულ, ორიოდე სიტყვადა. ეს საისტორიო ცნობა, შედგენილი ოფიციალურ ქალაქების მიხედვით, არ არის, სამწუხაროდ, გასულდგმულელებული ბატონ-ყმობის გადავარდნის მომსწრეთა ცხოველის ნაამბობითა, რადგან მწერლობაში სრულიად არ მოიპოვება

ამ გვარნი ნამბობნი დროულ კაცთა ანე მემუარები *). ხოლო ამ საისტორიო ცნობის მცირეოდენ შესავსებლად აქვე დავსძენთ, რომ დიდმა მთავარმა მიხეილ ნიკოლოზის ძემ ოქროს საათი უბოძა გორის ბლადოჩინს სოლომონ ხახანაშვილს იმ განსაკუთრებულის შემწეობისათვის, რომელიც მან აღმოუჩინა მთავრობას მაშინ, როცა 8 ნოემბერს გორში გამოცხადებულ იქმნა უმაღლესი ბრძანება გლეხთა განთავისუფლების შესახებ, ხოლო ფოტოგრაფებს: მაკაროვიჩს,

ხლამოვსა და კონდრატენკოს ებოძათ ძვირფასის თვლებით მოჭედილი ბეჭდები იმ შრომისათვის, რომელიც მათ გასწიეს მით, რომ აიღეს სურათი სადღესასწაულო ამბებისა გორსა, თელავსა და სიღნაღში იმ დღეს, რა დღესაც გამოცხადებულ იქმნა ამ ქალაქებში უმაღლესი ბრძანება 1864 წლის 13 ოქტომბრის თარიღისა.

ალ. ყიფშიძე